

Filipenses

Jacheuayama

1 ¹ Pablo y Timoteo, Jesucristbiamama oservénata, quem tsbuanácha fséntsabiamná Filipos béts pueblocama Bèngbe Bètsabe entšanga imomnënga, y Jesucristoftaca cánÿiñe mo canÿacá imomnëngbiamama. Fséntsabiamná nyetsca chë Jesucristbeñe ošbuáchiyëngbiamama, nyetsca chentša uanatsanëngaftaca y chë inÿe ošbuáchiyënga ujabuáchaniñe trabajayëngaftaca. ² Atše séntseimpadana Bèngbe Bètsá Bèngbe Taitá y Bèngbe Utabná Jesucristo, chabomama tsëngaftangbeñe tšabe bendicionënga chaotsemnama, y chabomama tsëngaftanga ainaniñe tšabe ebionana chašmotsebobomnama.

Pablo Bèngbe Bètsábioye tbojtanchuá ošbuáchiyëngbiamama

³ Cada tsëngaftangbiamama stenojuabó ora, Bèngbe Bètsá tsëngaftangbiamama sëndbètsatschuanaye; ⁴ y Bèngbe Bètsá tsëngaftangbe tšabiamama stseimpadana ora, atše corente oyejuayá chca sëndbètsama, ⁵ ntšamo tsëngaftanga atše šmojuájabuachama, tšabe noticiënga Jesucristbiamama entšanga abuyiynayiñe, tsëngaftanga Jesucristbeñe jtsošbuáchiyama šmonjanbojatšé orscana y méntsoñama. ⁶ Atše corente séntsetatšëmbo, Bèngbe

Bètsá tojanbojatšé tsëngaftangbe ainaniñe tšabe soyënga jtsamama, y más tšabe soyënga yochtsamama. Y chca yochtsama, lempe ntšamo tsëngaftangbiamama cha yojtsejuabnacá chaochnënguëntscuana, y chca, Cristo Jesús yochjésabèntscuana. ⁷ Atše tsëngaftangbiamama sempre ainaniñe sëndbètsenojuabnaye, chíyeca atšbiamama puerte tšabá entsemna chca tsëngaftangbiamama jtsejuabnayana. Tsëngaftanga nyetscanga atše šmonjuájabuache jamama chë Bèngbe Bètsá tša tšabia bétsemnayeca šonjanëntsabuaché trabajo. Atše chë Bèngbe Bètsabe trabajo sëndbomna jamama, mora séntsetámena ora o natjëmbana shjoca stšana ora, nyetscángbioye tšabá inÿinÿayiñe chë tšabe noticiënga ndegombre soyënga bétsemnama, y bëtscá amiñe entšanga chë soyënguñe corente chamotsošbuáchemama. ⁸ Bèngbe Bètsá yotátšëmbo ntšamo séntsihamcá ndegombre bétsemnama. Atše tša séntseboše tsëngaftanga jányama y cbontsababuanÿeshana cachcá ntšamo Cristo Jesús atše šondbobonshancá. ⁹ Atše, Bèngbe Bètsá séntseimpadana tsëngaftanga cada te más cha chašmotsebobonshánama y chë inÿengbioynaca, chca, osertánana chašmotsebobomnama ndayá chë ndegombre soye bétsemnama jtsetatšëmbuama, y chašmotsetatšëmbo

ndayá tsábá o ndayá ndoñe tsábá tondmënama; ¹⁰ y chca, chašmotsobena sempre jabocacayama chë puerte tsábá yojtsemna jamama soye. Chca, Cristo yochjésabo ora, tsëngaftanga puerte tsábe vida šmochántsebmna, bacna soyéngaca ndëmandánënga; y tondaye quešmochátama, chora chë entšanga chca ndoñe tsábá quenátsmëna ca chamuátichamuama. ¹¹ Y lempe ntšamo chašmojtsemná ndegombre tsábá echántsemna, y nÿe Jesucristo endobena jamama entšanga chca chamotsamama. Nÿetsca chë tsábe soyënga echántsemna, Bëngbe Bëtsá puerte bëtsá y uamaná bëtsemnama jinÿanÿiyama.

**Atšbe vida endmëna
Cristo jtseeservëna**

¹² Jesucristbeyeca atšbe catšátanga, atše séntseboše tsëngaftanga chašmotsetátšëmbo, ntšamo atše tijapasama, más bëtscá entšanga Jesucristbiamá tsábe noticiënguine chamotsošbuáchema tojoservema. ¹³ Chca, nÿetsca chë romanëngbe mandadbe bëts yebna bojanÿá soldadënga y chë inÿe entšanga quem luarentše montsetátšëmbo atše utamená stsemna, atše Cristbiamá tstrábája causa. ¹⁴ Atše utamená séntsemnayeca, ošbuáchiyënguentshana banga ainaniñe más añemo montsebmna, y chíyeca chënga Bëngbe Bëtsábe palabra más y más añémoca y tondayama ntjatauajcá entšángbioye montsabuayiná. ¹⁵ Ndegombre entsemna, báseftanga Cristbiamá entšángbioye imojtsabuayiná, pero chënga nÿe ntšamo tijashjachcá šmojtšántšabošama chca, y chënga imojtseboše, bëtscá jtšamëse, atše chayotjáyana; chíyeca chca imojtsama. Pero inÿengna,

entšángbioye montsabuayiná tsábe soyënga inÿengbiamá jamama ndegombre imojtsebošeyeca. ¹⁶ Mënga chca montsama, atše šmondbobonshánayeca y Bëngbe Bëtsá chë trabajo šojanëntšabuáchema mondétatšëmboyecca, Jesucristbiamá tsábe noticiënga ndegombre bëtsemnama entšanga jtsinÿanÿayana; ¹⁷ pero chë inÿengna chca imojtsama, ndoñe tsábe soyënga inÿengbiamá imojtsebošeyeca, ndoñe chënga chë inÿengbiamá tsábe soyënga imojtsebošeyeca. Chënga Jesucristbiamá imojtsoyebuambná nÿe entšanga chënga chamotsarrespetánama, y nÿe cachëngbiamá tsábe soyënga jtsebmnama imojtsebošeyeca. Chënga jtsejuabnayana mochjobenaye jamama atše más chašotsengmënama ca, muentše utamená chjëftsemnëntscuana, chënga entšángbioye chca tmojtšabuatambá ora. ¹⁸ Pero ¿ndayase chë soye atšbiamá? Masque ntšámnaca, tsábe soyënga inÿengbiamá tmojtseboše o ndoñe, Cristbiamá montsoyebuambná, y Cristbiamá chënga montsoyebuambnama atše oyejuayá séntsemna.

Y cabá más chanjóyejuaye, ¹⁹ er atše séntsetatšëmbo quem utámenentsana atše chjëseboचना. Atše séntsetatšëmbo muentšana chjëseboचना, tsëngaftanga Bëngbe Bëtsá šmoimpadánayeca y Jesucristbe Uámana Espiritu šujabuachánayeca. ²⁰ Atše corente jtsošbuáchiyëse Bëngbe Bëtsábeñe sëndobátmana, atše ndocna te tondaye chanjëftsema y chama chjaisëuatjama, pero añe nÿetscangbe delante becá añémoca chayoyebuambá, y nÿets tempo pero más mora, lempe ntšamo stsamama y stsihámua, atše chaima entšanga chaminÿanÿema

Cristo puerte bĕtsá y uamaná bĕtsemnama, y chca chántsama masque ainá o obaná chaitsemnĕse.

²¹ Chca entsemna, er atĕbe vida Cristo jtseservĕnama endmĕna, y nderado atĕe chajjĕbanĕse, nyĕtsanga puerte bĕts soye mochanjĕftsashjache. ²² Pero atĕe ainá stsemnĕse, chanjobenaye más uamana trabajo Cristbiana jĕftsemama. Chĭyeca, atĕe ndoĕne corente quetsátstatĕmbo ntĕsamo mora jobuáyanana, ainá jtsemnama o ndoĕne. ²³ Ndegombre mora puerte ŝontĕtĕmnana ntĕsamo jobuáyanana: atĕe tĕa sĕndboĕse ndoĕne más quem luarentĕse ntjĕftsemnana, Crĭstoftaca jtsatsmĕnana, y ndegombre chca atĕsbiana puerte tĕabá nántsemna; ²⁴ pero, ínĕoicana tĕĕngaftangbiana ŝontsemna ainá jĕftsemnana.

²⁵ Atĕe corente sĕntsetatĕmbo chca ndegombre yochtsemnama, y chĭyeca sĕntsetatĕmbo atĕe cabá ainá chjĕftsemnama, tĕĕngaftanga jujabuáchama más Jesucrĭstbeĕne chaĕmotsoĕbuáchema, y chiĕne bĕtscá oyejuayana chaĕmotsebobomna. ²⁶ Chca, atĕe tĕĕngaftanga jutsĕtsayama choye chajá ora, chaĕmobená inĕe soyama más Cristo Jesús jĕtschuayama.

²⁷ Morna, chĕ más uamana soye entsemna, tĕĕngaftanga chaĕmotsama ntĕsamo jtsiyenama ntĕsamo chĕ Cristbiana tĕabe noticiĕnguĭne endayancá. Y mĕntĕsá, cachcá, jutsĕtsayama chajá o ndoĕne, atĕe chántsetatĕmbo tĕĕngaftanga Jesucrĭstbeĕne oĕbuáchiyama ndoĕne ŝmontsajbanama, y afĭne becá oĕbuáchiyana chábeĕne ŝmotsobomñama; nyĕtsanga cachcá ŝmojtsejuabnáyeca y nyĕtsanga cach soye ŝmojtseboĕseyeca, cánĕyĭne nyĕtsanga enutanánĕnga jtsenojuerzánĕse, ndocná chĕ tĕabe

noticiĕnguĭne tĕĕngaftanga ŝmobomna oĕbuáchiyana chacmondábuajuanama. ²⁸ Tĕĕngaftangbe uayayĕngbiana tondayama ŝmattsauatja, sempre bĕtscá añemo ŝmochtsebobomna. Chca tĕĕngaftanga ŝmochanjĭnyĕnyĕye chĕnga pochocánĕnga mochtsebnama, y tĕĕngaftangna atsebácánĕnga ŝmochtsebnama. Y chĕ soye Bĕngbe Bĕtsá tĕĕngaftangbiana echántsama, Crĭstbeĕne ŝmoĕbuachĕyeca. ²⁹ Chca echanjopása, er Bĕngbe Bĕtsá tĕĕngaftangaftaca puerte tĕabia endmĕna, Crĭstbiana oservĕnga Bĕngbe Bĕtsá tmojábiana, pero ndoĕne nyĕe chábeĕne chaĕmotsoĕbuáchema, ndayá chabiana chaĕmosufrĭmnaca. ³⁰ Tĕĕngaftanga y atĕe cachca soyama montsenojuerzana. Tĕĕngaftanga ya ŝmonjinĕe ntĕsamo atĕe sĕnjánenojuerzana, entsanga jinĕnyĕnyĕyama chĕ tĕabe noticiĕnga ndegombre soyĕnga bĕtsemnama. Y mora, tĕĕngaftanga noticiĕnga ŝmochanjĕyĕngacĕne ntĕsamo atĕe cach soyama cachcá stsamama.

**Ndoĕne uámanĕnga
ŝmattsenobiamnaye, ntĕsamo
Cristo ndoĕne tonjanmcá**

2 ¹ Tĕĕngaftanga, Crĭstoftaca cánĕyĭne mo canĕyacá jtsemnĕse, ainaniĕne bĕtscá añemo ŝmontsebobomna. Cristo cmondábuanĕyeshana, y chĕ soye tĕĕngaftanga cmontĕjĕjabuachana nyĕtsca trabajĕnguentĕšana tĕabá jabocanama. Y tĕĕngaftanga Crĭstbe Espĭritoftaca cánĕyĭne mo canĕyacá ŝmontsemna; tĕĕngaftanga nyĕtsanga ŝmondĕnbobonshana y nyĕtsangbiana jóngmĕnana ŝmondumana. ² Tĕĕngaftanga lempe chca ŝmobómnyayeca, atĕe corente oyejuayá ŝmochjábema, er tĕĕngaftanga nyĕtsanga cachcá cánĕyĭne ŝmondĕjuabná, cachcá nyĕtsanga ŝmondĕnbobonshana,

nÿetscanga mo canÿe ainancá
 ſmondbomna, y nÿetscanga cachca soye
 ſmondboſe. ³Todaye ſmattsama nÿe
 ínÿenga chë sóyeca chamotjáyana, o
 nÿe tſëngaftanga tſa bëts soyënga amënga
 ſmomna ca entſanga chamotſejuabnama;
 pero ndoñe yapa uámanënga ſmojtsemna
 ca ſmochtſejuabnaye, y cada ona
 chaotſejuabná chë ínÿenga bëngbiana
 más uámanënga imomnana. ⁴Y ndocná
 tondaye chaondétsama, nÿe chabiana
 tſabe soyënga jónÿenama, sinó ndayánaca
 chaotsama nÿetscangbiámna tſabe
 soyënga jónÿenama.

⁵Tſëngaftanga cmontsamna
 jtsemnana ntſamo cach Cristo Jesús
 yojanjuabná y yojanamcá:

⁶Cha nÿets tempo yomna cach
 Bëngbe Bëtsacá y uamaná cach
 Bëngbe Bëtsacá,
 pero masque chca, ndocna te
 yonjanjuabná:
 “Atſe séntseboſe nÿetsca
 entſanga nÿets tempo atſe
 chaſmotſerſpetana, ntſamo
 atſbe Taitá Bëngbe Bëtsá
 mondërſpetaná ca.”

⁷Pero cha mo nduamanacá
 tonjanóbema, nÿetsca chabe
 bomna soyënga jéftſeboshjonëse,
 y ndegombre, mo canÿe
 oſervenacá tojanóbema.
 Cha canÿe entſacá tojanonÿná,
 y entſanga canÿe ndegombre
 entſacá tmojáninÿe.

⁸Cachá tojanleſenciá nduamaná
 jtsemnana,
 y ſempre Bëngbe Bëtsábioye
 ibnayeunana, y jobanámnaca,
 cruciñe jóbanëse.

⁹Ndayá cha tonjanmama, Bëngbe
 Bëtsá, chë celoca más uámana
 luare tbojaninÿinÿe
 y chë más uámana uabaina,
 chë más bëtsétsangbe

uabainënguentſa uabaina
 tbojabuajo;

¹⁰y chca, celoca imomnënga, y quem
 luarentſe y fshantſe jashenoye
 imomnéngnaca nÿetscanga
 chamóſhamentſema,

Jesúsbioye jëtschuayama, chabe
 uámana uabaina jayanëse;

¹¹y chca, nÿetscanga chamuayana
 Jesucristo chëngbe Utabná
 yomna ca,
 chca, Bëngbe Bëtsá
 chë Taitá nÿetscanga
 chamotsatschuanama.

**Cristbeñe oſbuáchiyënga
 entsamna mo buaſhinÿinÿana
 estrellëngcá jtsemnana**

¹²Chcasna, atſbe bonshana
 catsátanga, ntſamo atſe
 tſëngaftangaftaca ſënjamna ora,
 atſe ſempre ſmonjanëyeunancá,
 mora más ſmochtsatëñëyeunana,
 mora atſe tſëngaftangbiana
 bënoca ſtemna ora. Bëtsétsanga
 ntjatenobiamnacyá y Bëngbe Bëtsá
 jtſerſpetánëse ſmochtsama
 soyënga, chca, tſëngaftangbe
 tſabe videntſe, Jesucristbeñe
 oſbuáchiyënga quetsomñecá, tondaye
 chacmondëtsabuáſhebenama;
¹³er Bëngbe Bëtsá nÿets tempo
 tſëngaftangbe ainaniñe inétsama
 tſëngaftanga ndayánaca
 chaſmotſeboſama y chaſmotsamama,
 ntſamo cha yojuaná y yoboſcá
 chaotsemnana.

¹⁴Ndayánaca jamama
 chacmojtſéjaboto ora, chë soye
 ſmochjama, chca jamama yapa totcá
 comna ca ntjatichamcá y ínÿengaftaca
 jabuachana ntjatenatsëtsnacyá. ¹⁵Chca
 cmontsamna, chca, tſëngaftanga
 ſmojtsama soyënguiñe ndocná ndocna
 bacna soye chaondínÿenama, y puente

tšabe vida chašmotsebomnama. Bëngbe Bëtsabe puerte tšabe basengcá šmochtsiyena, tšëngaftanga chë šmojtsemnënga canÿe luarentse puerte bacna entšàngbeñe y sempre bëtscá bacna soyënga jtsamana uamanéngbeñe. Chíyecna, tšëngaftanga šmochtsiyena puerte tšabe soyënga jtsamëse, y chca tšëngaftanga šmochántsemna mo canÿe ibetiñe luarentse buashinÿinÿana estrellëngcá. ¹⁶Chë tšabe soyëngaca entšàngbiöye chauinÿanÿé ntšamo muanjobenaye tšabe vida jtsebomnama. Chca chašmojamëse, Cristo cachiñe yochjésabo ora, atše chantsobena tšëngaftangbeyeca puerte oyejuayá jtsemnana, er ntšamo chašmojamcá echanjínÿanÿiye atše ndoñe nÿe bonamente jabuache tijatrabájá. Chca atše chántsemna mo nda bëtscá tojoprontá, y chentšana ínÿengaftaca tojótjajo ora, chéngbiöye tojtsayëñjanacá. ¹⁷Mo chë altaroca canÿe bachna buiñe tojuabuashanacá, Bëngbe Bëtsá jëtschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábiöye oyejuayá jabemama. Tšëngaftanga bëtscá šmojalemošná, Crístbeñe tša šmošbuachéyeca, y tšëngaftangbe ošbuachiyánënaca endmëna Bëngbe Bëtsábiöye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábiöye oyejuayá jabemama. Atše chca stjobanëse, puerte oyejuayá stsemna, y stjama tšëngaftángnaca cachcá chašmotsóyejuama. ¹⁸Chca, tšëngaftanga cmontsamna oyejuayënga jtsemnana, y šmochjama átšnaca oyejuayá tšëngaftangaftaca chaitsemnana.

Timoteo y Epafrodito

¹⁹Atše becá ošbuachiyánaca Bëngbe Utabná Jesúsbeñe jtsobatmanëse, sëntsejuabná pronto chjobenaye Timoteo tšëngaftangbiöye jíchmuama, tšëngaftangbiamama chašuabocuéntama, y chca, atše más añemo chaitsatsbomnama. ²⁰Er nÿe cha endmëna canÿa cach atšcá ainaniñe juabnayá, y cha ndegombre puerte entseboše tšëngaftanga tšabá chašmuetsiyenama; ²¹chë ínÿengna nÿetscanga nÿe cachëngbe tšabiamama ndayánaca jamama jtsejuabnayana, y tondaye ntsebošana Jesucristbiamama. ²²Pero cach tšëngaftanga ya šmondétatšëmbo, ntšamo Timoteo chë padecena soyënguentšana tšabá tonjétsobocñama, y ntšamo Timoteo y atše, mo canÿe uaquiniñá chabe taitábiöye cuaftsajabuachancá, cánÿiñe fsënjantrabájá, más bëtscá entšanga chë tšabe noticiënga chamóyëngacñama. ²³Chcasna, atše sëntsobátmana cha jíchmuana, ntšamo átšëftaca jopásama chaitsetátšëmbo y cachora; ²⁴pero bëtscá ošbuachiyánaca sëntsobatmánayeca, sëntsejuabná, Bëngbe Utabná chašojtábocnëse, pronto átšnaca chjobenaye choye jama.

²⁵Atše sëntsejuabná yojtsemna, Jesucristbeyeca bëngbe catsata Epafrodítmama choye jíchmuana, nda átšëftaca cánÿiñe endëtrabájá y chë tšabe noticiënga ndegombre soyënga bëtsemnana jinÿanÿiyama endenojuerzana, nda tšëngaftanga šmojanichmó atše chašuabëuájabuachama. ²⁶Cha chanjíchmua; cha puerte entseboše tšëngaftanga jányama, y yapa ngmënaca entsemna, cha šocá enjamnama šmojátatšëmbonama. ²⁷Y ndegombre cha šocá enjamna, y

enjétsinýna mo jtsobanamcá; pero Bèngbe Bètsá tbonjalastemá, y ndoñe nýe chábioye sinó átšbioynaca, atše ndoñe más ngmenanènga chayátsbomnama, ntšamo mora séntsebomnama. ²⁸ Chíyeca atše más séntseboše cha pronto jíchmuana, as tsèngaftanga cha chašmojtínýe ora, puerte oyejuayènga chašmotsemnama, y atše ndoñe yapa chašondétsengmenama. ²⁹ Šmochjofja nýets oyejuayánaca, Bèngbe Utabnábeyeca catšátanga quetsomñecá; y nýets tempo chacá améngbioye mo bètsétsangcá šmochtsétabna, ³⁰ er batšatema más y matènjétsobana, Cristbiana trabajayíne uajabuachaniñe. Cha chë trabajo tonjanma atše juajabuáchama, ntšamo cach tsèngaftanga ndoñe chešmatanobenacá, atše juajabuáchama.

Ndayá Pablébiana ndegombre corente yojanámana

3 ¹ Y morna, atšbe catšátanga, ndayá Bèngbe Utabná tojamama móyejuanga. Ndoñe bacá quešnatámana, ntšamo chë inýe tsbuanáchañe tcbonjanèbuabiamcá cachcá cachiñe jtétyanama; y chë soye bètscá cmochanjújabuache ndoñe resjuiñe chašmondétsemnama. ² Cuedado šmochtsebmna chë ndoñe tsabe entšangbiana, mo quešngcá imomnènga, chë puerte bacna soyènga mondbétsamènga, y entšangbe más delicadentše base bobachtema jatétsana uamanènga; ³ er bènga mondmèna y ndoñe ínýenga, chë ndegombre uinýnanánana bomnènga, bènga Bèngbe Bètsabe entšanguentšènga bétsemnama, bènga chë Uámana Espíritbe uajabuáchenanaca Bèngbe Bètsá mondadoránama, bènga chë Cristo

Jesúseftaca cánýiñe mo canýacá bétsemnama mondbétsoyeuama, y bènga chë ntšamo ínýenga monduamancá bèngbe cuerpiñe jamama tondayama yondoservénama mondbétsejuabnayama.

⁴ Masque atše razón sèndétsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebmna chë soyènga yoservena ca jtsejuabnayama, ndegombre atše chabiana más razón chama stsóbomñe. ⁵ Sènjanonýná y posufta tianoye base bobachtema chë más delicadentše šmojtantèše; atšbe nýets uta bètsétsata Israeloca entšanguentšata bonjamna, y atšna Benjaminbe bèts pamillentšá sèndmèna; atšbe tempsca bèts taitanga nýetscanga hebreunga immamna. Atšna fariseo sènjamna. Atše sènjánama, lempe ntšamo judièngbe leyènguñe endayancá, ndayá jamama šojanmèncá. ⁶ Atše tša sènjánboše Bèngbe Bètsá jtse servénama, chíyeca Jesúsbeñe ošbuáchiyènga bètscá sènjanécamena; y ndayá canýe entšá ibntsemna jtsamama, Bèngbe Bètsabe bominýiñe tsábia jtsemnama, judièngbe ley jtso cumplínese, chama ndocná tondaye quenjátsbmna jayanama, atše ndoñe tsábá séntsanama ca.

⁷ Pero lempe chca ntšamo atše sènjamnama y ndayá sènjánamama, puerte sènjanjuabná atšbiana puerte yojanámana ca; pero mora, Cristo atšbe ainaniñe tonjámashèngoyeca, chë soyènga atšbiana ya ndoñe quenatámana. ⁸ Y cabá más, tondaye atšbiana quenatámana, chë bèts soye jtsonýayèse, Cristo Jesús, Bèngbe Utabná jtsabuatmana. Chábeyeca, lempe chë nýe quem luarentša soyènga sènjéseboshjona, y lempe

chê soyënga atšbïama tondayama quenátoservena; y chca entsemna, chë bëts soye jëftsashjáchama, Cristo jtsabuatmama, ⁹y cháftaca cánÿiñe mo canÿacá jtsemnama. Atše ya ndoñe quetsatsnguá Bëngbe Bëtsabe bominÿiñe tšabia jtsemnama, nÿe ntšamo atše tijamama chë judiëngbe ley jtsocumplínese, pero Crístbeñe jtsošbuáchiyëse añe; Bëngbe Bëtsá entsama atše chabe bominÿiñe tšabia chaitsemnama, atšbe bacna soyëngama jtseperdónase, y lempe chca entsemna atše Crístbeñe sëndošbuachéyeca. ¹⁰Atše sëntseboše ndayá cha jtsabuatmana, chë obanënguentšana tojtanayenama cha tojaninÿanyé obenana atše chaitsebomnama, atše cháftaca cánÿiñe mo canÿacá chaitsemna ora; y ntšamo bënga játsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnama; ¹¹y ntšámnaca, atše jëftsashjáchama Bëngbe Bëtsá chaoma atše chaitayenama.

**Yejuana jtsentšënëse, Bëngbe
Bëtsábiocana uacanána
josháchiñama**

¹²Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bëngbe Bëtsabe bominÿiñe stsemna ca, pero sempre natsanoye sëntsá, mo nda canÿe luaroye jashjanguama cuaftsëchamancá; y puerte jtsošbuáchiyëse sëntsobátmana atše chjobenaye jtsemnama, chë ndayama Cristo šojanchembo, er Cristo Jesús ya tonjama atše chabïama chaitsemnama. ¹³Atšbe catšátanga, atše ndoñe quetsátichamo chca ya tijashjache ca. Pero chama canÿe soye sëntsama: chë tempo atše sënjánbomna

y sënjánama soyënga, mora lempe stëtšoye sënjaquedá, y bëtscá sëntsama jobenayama chë jashjanguama yojtsemnoye jashjanguama, ¹⁴chë ndémoca yojtsemna jashjanguama luaroye jobenayama jashjanguama, mo nda canÿe luaroye jashjanguama ndayánaca juácanama bëtscá jenojuérsase cuaftsëchamancá. Cachcá, átšnaca sëntsá chë Bëngbe Bëtsá šojtsachembuana uacanána josháchiñama, Cristo Jesúsbeyeca; y chë uacanána entsemna chë nÿetsca tescama yomna tšabe vida jtsebomna.

¹⁵Chca bënga šontsamna jtsejuabnayana, chë Jesucrístbeñe puerte ošbuáchiyana y nÿets tempo cha ústonënga; y nderado tšëngaftanga ndayíñnaca inÿetšá šmojatsjuabná ora, Bëngbe Bëtsá chë sóynaca tšabá cmochanjínÿanyie. ¹⁶Pero morna šontsamna jtsiyenana ntšamo méntscoñama Bëngbe Bëtsabe soyëngama šojosertacá.

¹⁷Jesucrístbeyeca catšátanga, ntšamo atše sëndmëncá tšëngaftanga šmochtsemna, y chë ntšamo jtsiyenama tcbonjaninÿanyecá imojtsiyenëngbiyoye šmochtsënÿayey.

¹⁸Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngménaca sëndbëtsemna. Banga mondmëna, y chënga ntšamo vida imojtsebomnama montsinÿinÿná, lempe ntšamo Cristo chë cruciñe jóbänëse bëngbïama iuayancá contra chënga imojtsemnama, ¹⁹y chëngbiyoye nÿetsca tescama infiernoca mochántsapochocoye. Chëngbïama chë más uámana soye yojtsemna jtsamana ntšamo cachënga tmojtsebošcá, nÿe cachëngbe cuerpiñe tšabá jtsoññama. Chënga nÿa mo bëts soye cuaftjamcá

jtsemnana chë soyënga tmojtsama ora, pero ndegombre chënga entsamna cach soyëngama jtsëuatjama; y chënga sempre jësejuabnayana chë nÿe quem luarama enójuabnayëngbe soyëngama. ²⁰Chë cuenta bëngna, ndegombre celocama entsanga mondmëna, y mora montsobátmana, chë luarocana chauabo bëngbe atsebacayá, Bëngbe Utabná Jesucristo. ²¹Cha bëngbe cuerpënga, chë pronto jopochócama cuerpënga echanjátrocaye, jtsemnama mo chabe cuerpcá, chë obanënguentšana tojtayenabe cuerpcá; y cha chca echanjama, cha puerte obenana lempe jtsemándayama bómnyeca.

**Bëngbe Utabnáftaca cánÿiñe
mo canÿacá jtsemnëse
oyejuayana jtsebomnana**

4 ¹Chcasna, Jesucristbeyeca atšbe catšátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyëse, cháftaca cánÿiñe mo canÿacá šmochtsemna. Corente cbondábabuanÿeshana y tša séntseboše tšëngaftanga jánÿama. Tšëngaftangbeyeca atše puerte oyejuayá séntsemna, y atše corente sëndbétsoyejuaye tšëngaftangbiamá inÿëngbioye jáuyanama.

²Evodia séntseimpadana y Síntiquenaca, chata chabuatenóyeunama, mo Bëngbe Utabnábeñe ošbuachiyata quetsomñecá.

³Y ácnaca, nda puerte tšabá átšeftaca tconjatrabajá, cbontseimpadana chama chë shembásata chacújabuachama, er chata bëtscá átšeftaca tbonjatrabajá tšabe noticiënga entsanga abuayinayíñe. Clemente y inÿe entsanga átšeftaca tmonjatrabajá cach soye amiñe. Nÿetsca chëngbe uabaina entsábemana chë librésañe,

ndayentše yojtsábemana chë tšabe vida mochjónÿenëngbe entsangbe uabaina.

⁴Sempre oyejuayënga šmochtsemna, Bëngbe Utabnáftaca cánÿiñe mo canÿacá jtsemnëse, y cachiñe šcutétayana: iMóyejuanga!

⁵Nÿetscanga chamotsetátšëmbo, tšëngaftanga tšabe juabna bomnënga šmomnana. Bëngbe Utabná jésabama tempo ya entsobeco.

⁶Todayama šmattsenócochinÿena, pero cada Bëngbe Bëtšáftaca chašmojtsencuënta ora, ndayá cmojtsëjabortama cha šmochjaimpáda. Y chca chašmojtsama ora, chánaca šochtsatschuanaye. ⁷Chca, Bëngbe Bëtšá echanjama chë chabe ainaniñe tšabe ebionana tšëngaftanga chašmotsebomnana; chë tšabe ebionana puerte bëtscá endmëna, y bënga entsanga quetsomñecá ndoñe ntsobenana chama jósertana; y chca tšabe ebionánaca, tšëngaftangbe juabnënguiñe y ainaniñe todayama quešmochátenocochinÿena, er tšëngaftanga cánÿiñe mo canÿacá Cristo Jesúseftaca šmondmëna.

**Lempe ntšamo tšabá yomncá
soyëngama jtsejuabnayana**

⁸Cabana, atšbe catšátanga, lempe ntšamo ndegombre yomncá soyënguiñe šmochtsejuabnaye, lempe chë respeto yomerecëniñe, nÿetsca soyënguiñe entsangbe bominiñe tšabá yomniñe, nÿetsca corente tšabá yomniñe, nÿetsca soyënga entsanga yogusetániñe, y lempe chë ndayama entsanga tmojtsejuabná tša iuámana ca soyënguiñe. Lempe chë tšabá yomna soyënguiñe y jtsatschuanayama yomna soyënguiñe šmochtsejuabnaye.

⁹Sempre šmochtsama chë átšbentsana šmojuábouinÿe soyënga, chë atšbiajana šmojóyëngacñe

soyënga, chë atše šmojoyeuná soyënga y ntšamo šmojinýcá atše jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebomnama amá, tšëngaftangaftaca echántsemna.

**Pablo tojtanacheuá
tmojanájabuachama**

¹⁰ Atše corente sëndoyeuá Bëngbe Utabnáftaca cányiñe mo canýacá tsmënama, er tšëngaftanga ba ishinýe chentšana, cachiñe šmojatobená atše jatinýinýiyana ntsachetšá atšbe tšabiana tšëngaftangbiana iuámanana. Chca, atše ndoñe quetsátichamo tšëngaftanga atšbiana cmojtsanebnétjomba ca, ndayá ntšamo tšëngaftanga tšabá šmojuabnacá atše jinýinýiyama ndoñe yonjanopodena ca. ¹¹ Atše chca, ndoñe quetsátichamo uajabotá stsemna ca, er atše sënjuatsjinýe sempre oyejuayá jëftsemnana, nýe ndaye soyiñe masque batšatémnaca stsebomñese. ¹² Atše sëndétatšëmbo ntšamo yomna jtsiyenana chë vida jtsebomnama uajaboto soyënga tojtsashbenëse, y ntšamo yomna jtsiyenana chë tcuajabótama más bëtscá jtsebomñese. Atše tijuatsjinýe oyejuayá jtsemnana masque nýe ndaye soyënguínñaca stsemna ora, jasama bëtscá stsebomna ora o masque nýe shëntseca jtsemnama šojtsemna ora, atše jtsiyenama bëtscá soyënga stsebomñese o masque ndóñnaca. ¹³ Atše lempe chca sëndobena, atše obenana jtsebomnama Cristo endbétsamayeca. ¹⁴ Masque chcasna, tšëngaftanga tšabá šmonjama, atše padecena soyënguine sënjamna ora atše juajabuáchana.

¹⁵ Tšëngaftanga, chë Filipos puebloca Jesucristbeñe ošbuáchiyënga, corente šmondétatšëmbo, Macedonia

luarentšana sënjëftsanbocna ora, nýe tšëngaftanga atše šmonjanájabuachama; inýe ošbuáchiyënga ndoñe. Chora enjamna atšbe bojatsena tempo tšëngaftangbe luarentše chë tšabe noticiënga entšanga abuayinayañe; y nýe tšëngaftanga atše šmonjanájabuache. ¹⁶ Ba soye atše Tesalónica puebloca sënjamna ora, y chašmuájabuachama šonjanájaboto ora, tšëngaftanga atšbe opresidëngama crocénana šmonjanafja. ¹⁷ Chca ndoñe quenátayana atše tsjuabná nýe tšëngaftangbentšana ndayánaca jójyëngacñama ca; chë sóyeca atše sëntseboše ndayá tšëngaftanga más tšabe soyënga chašmotsamama, Bëngbe Bëtsá tšëngaftangbiana más chaotsóyejuama. ¹⁸ Er atše ya lempe sënjóyëngacñe, y chë šuajabótama cabá más sëntsebomna. Atše chë ntšamo šjuajabotcá lempe sëntsebomna, chë tšëngaftanga Epafrodítóftaca šmonjanichmó soyëngaca. Ndayá atše šmojanichmocá, Bëngbe Bëtsabe bominiñe puerte tšabá entsemna, mo juatšëmbonama ndayá tcojóba y altaroca tcojajuinýe y botamana tojtsonguëtšecá, chora cha oyejuayá chca jójyëngacñana. ¹⁹ Atšbe Bëtsá, chabe bëtscá uamana y bëts bomnánaca, echanjama tšëngaftanga lempe ntšamo cmëjabotcá Cristo Jesusbiajana chašmóyëngacñama. ²⁰ Entšanga nyets tempo chamotsinýanýná Bëngbe Bëtsá y Bëngbe Taitá puerte uamaná bëtsemnama. Chca chaotsemna.

Chënga jtadióšoftanama

²¹ Atšbe cuenta, nyetscanga chë Jesucristbeyeca Bëngbe Bëtsábenga imomnënga šmochjácheuaye. Atšeftaca montsemna Jesucristbeyeca catšátangnaca cmontsacheuaná.

²²Nyetscanga chë muentše Bëngbe
Bëtsábenga imomnënga, y más chë
romanëngbe mandadbe bëts yebnoca
oyenënga, cmontsacheuaná.

²³Atše séntseimpadana Bëngbe
Utabná Jesucristo, chaoma
tšëngaftangbeñe tšabe bendicionënga
chaotsemnama.